

MITI: 141 projek berpotensi pelaburan RM72.6 bilion di Malaysia
Astro Awani
13 Ogos 2020
Harits Asyraf Hasnan,

KUALA LUMPUR: Sejumlah 141 projek dengan nilai potensi pelaburan RM72.6 bilion telah dikenal pasti di Malaysia.

Menteri Kanan Perdagangan Antarabangsa dan Industri (MITI), Datuk Seri Mohamed Azmin Ali berkata Lembaga Pembangunan Pelaburan Malaysia (MIDA) mengunjurkan pelaburan itu adalah untuk tempoh sehingga tahun 2021.

Menurutnya, antara sektor yang menjadi sasaran kerajaan adalah sektor berkualiti tinggi, berintensifkan pengetahuan dan modal, berteknologi tinggi dan bernilai tambah tinggi, yang akan meningkatkan peluang pekerjaan berkualiti di Malaysia.

“Selain projek-projek yang telah diluluskan setakat Mac 2020 sebanyak RM37.4 bilion, MIDA juga sedang menilai sebanyak 725 permohonan baharu dengan anggaran jumlah pelaburan sebanyak RM36.7 bilion.

“Daripada jumlah keseluruhan ini, sebanyak RM19.2 bilion (52.3 peratus) merupakan pelaburan langsung domestik dan RM17.5 bilion (47.7 peratus) adalah pelaburan langsung asing,” katanya di Dewan Rakyat hari ini.

Beliau berkata demikian sebagai menjawab soalan Datuk Seri Ahmad Maslan (BN-Pontian) yang ingin tahu kesan negatif dan positif ke atas Malaysia sejak perang perdagangan antara Amerika Syarikat (AS) dan China serta akibat penularan COVID-19.

Ia termasuk langkah-langkah proaktif yang diambil untuk mengatasi cabaran itu termasuk defisit perdagangan serta keberkesanan langkah-langkah yang telah diambil.

Mohamed Azmin berkata kerajaan juga telah melihat bagaimana usaha-usaha baharu harus ditingkatkan termasuk meningkatkan kolaborasi serantau, apabila Malaysia dan negara-negara ASEAN telah bersetuju menandatangani Perjanjian Kerjasama Ekonomi Komprehensif Serantau (RCEP) pada hujung tahun ini.

“Ini adalah antara usaha untuk membuka pasaran baharu di peringkat serantau dan kawasan baharu. Kita harus ingat bahawa ASEAN mempunyai pasaran yang besar, penduduk seramai lebih kurang 650 juta orang.

“Sudah tentu ada potensi sekiranya Malaysia dapat meningkatkan daya saing di peringkat global dan serantau untuk memenuhi permintaan pasaran ini,” katanya.

Menurutnya, kerajaan melihat krisis perdagangan AS-China dapat membuka peluang baharu bagi Malaysia, namun negara harus menyiapkan diri dengan pendekatan dan dasar baharu pelaburan bagi memenuhi permintaan pasaran pada hari ini.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/miti-141-projek-berpotensi-pelaburan-rm72-6-bilion-di-malaysia-255064>